

ZAKON O KONCESIJAMA – RADNI MATERIJAL

DIO PRVI - DODJELA KONCESIJE.....	2
POGLAVLJE I. OPĆE ODREDBE.....	2
POGLAVLJE II. PRIPREMNE RADNJE ZA DODJELU KONCESIJE	7
POGLAVLJE III. POSTUPAK DODJELE KONCESIJE	14
DIO DRUGI – UGOVOR O KONCESIJI.....	19
POGLAVLJE I. UGOVOR O KONCESIJI	19
POGLAVLJE II. PRESTANAK KONCESIJE.....	23
POGLAVLJE III. NADZOR, PRAĆENJE I IZVJEŠTAVANJE O PROVEDBI ZAKONA	25
DIO TREĆI - PRAVNA ZAŠTITA	26
DIO ČETVRTI - PREKRŠAJNE ODREDBE	27
POGLAVLJE I. PRAVNA ZAŠTITA	27
POGLAVLJE II. PRELAZNE I ZAVRŠNE ODREDBE	28
PRILOG I	30
PRILOG II	30

NACRT

Na osnovu člana 37. Stav (1) tačka f) Ustava Zeničko-dobojskog kantona, Skupština Zeničko-dobojskog kantona, na _____ sjednici, održanoj dana _____ 2018. godine donosi:

ZAKON O KONCESIJAMA

DIO PRVI - DODJELA KONCESIJE

POGLAVLJE I. OPĆE ODREDBE

Član 1.

(Predmet Zakona)

- (1) Zakonom o koncesijama (u daljem tekstu: Zakon) uređuju se vrste koncesija, značenje pojmova, načela, područje koncesija, predmet koncesija, postupci dodjele koncesija, ugovor o koncesiji, prestanak koncesije, politika koncesija, pravna zaštita u postupcima dodjele koncesije, te druga pitanja u vezi s koncesijama u Zeničko-dobojskom kantonu (u daljem tekstu: Kanton).
- (2) Na pitanja koja nisu uređena ovim Zakonom odgovarajuće se primjenjuju posebni zakoni.
- (3) Sastavni dio ovoga Zakona su:
 - a) Prilog I. Popis djelatnosti iz SKD za koje je obavezna dodjela koncesije, uključujući izvođenje radova i pružanje usluge
 - b) Prilog II. Djelatnosti koje se obavljaju na temelju isključivog prava
 - c) Prilog III Usluge iz člana 9. Zakona

Član 2.

(Pravna stečevina Europske unije)

Ovaj Zakon zasniva se na primjenjivim odredbama iz sljedećih akata Europske unije (u daljem tekstu: EU):

- a) Direktiva 2014/23/EU Europskog parlamenta i Vijeća od 26. 2. 2014. godine o dodjeli ugovora o koncesiji (SL L 94, 28. 3. 2014.);
- b) Ispravak Direktive 2014/23/EU Europskog parlamenta i Vijeća od 26. 2. 2014. o dodjeli ugovora o koncesiji (SL L 114, 5. 5. 2015.);
- c) Delegirana uredba Komisije (EU) 2015/2172 od 24. 11. 2015. o izmjeni Direktive 2014/23/EU Europskog parlamenta i Vijeća u vezi s pragovima primjene za postupke dodjele ugovora (SL L 307, 25. 11. 2015.)

Član 3.

(Gramatička terminologija)

Gramatička terminologija korištenja ženskog i muškog roda za pojmove u ovom zakonu, podrazumjeva oba roda.

Član 4.

(Pojam i vrste koncesija)

- (1) Koncesija je pravo koje se stiče ugovorom.
- (2) Vrste koncesija su:

- a) koncesija za privredno korištenje općeg ili javnog dobra;
 - b) koncesija za javne radove;
 - c) koncesija za javne usluge.
- (3) Koncesija za privredno korištenje općeg ili javnog dobra je ugovorom uređen pravni odnos, čiji je predmet korištenje određenog općeg ili javnog dobra.
- (4) Koncesija za javne radove je ugovorom uređen pravni odnos, kojim koncesor povjerava Koncesionaru izvođenje javnih radova i/ili održavanje objekata, koji se grade ili su izgrađeni na općem ili javnom dobru.
- (5) Koncesija za javne usluge je ugovorom uređen pravni odnos, kojim koncesor povjerava Koncesoru pružanje i upravljanje javnim uslugama.
- (6) Dodjela koncesije za javne radove ili koncesije za javne usluge uključuje i prijenos na Koncesionaru operativnog rizika u iskorištavanju tih radova ili usluga, koji obuhvaća rizik potražnje ili rizik ponude ili oboje.
- (7) Operativnim rizikom iz stava (6) ovoga člana smatra se rizik izloženosti Koncesionara tržišnim uslovima na način da Koncesionaru od strane Koncesora nije zagarantovano da će posredno ili neposredno, ostvariti povrat uložениh sredstava ili troškova nastalih u izvođenju javnih radova ili pružanju javnih usluga koje su predmet koncesije.

Član 5.

(Značenje pojmova)

Pojedini pojmovi u smislu ovoga Zakona imaju sljedeće značenje:

- a) Koncesor je organ javne vlasti kantona ili jedinice lokalne samouprave (JLS) koji je, u skladu s ovim i posebnim zakonima, nadležan za dodjelu koncesije;
- b) Koncesionar je privredni subjekt, registrovan u skladu sa Zakonom o privrednim društvima Federacije Bosne i Hercegovine, u vlasništvu domaćeg ili stranog lica, s kojim je Koncesor sklopio ugovor o koncesiji;
- c) Nadležni organ Koncesora za koncesije iz nadležnosti Kantona je Direkcija za koncesije, a za koncesije iz nadležnosti JLS je nadležno upravno tijelo JLS.
- d) privredni subjekt je pravna osoba ili zajednica tih osoba koja na tržištu nudi izvođenje radova i/ili posla, isporuku robe ili pružanje usluga;
- e) ponuđač je jedan ili više privrednih subjekata koji je blagovremeno dostavio ponudu u postupku dodjele koncesije u skladu sa Zakonom. Ponuđač kojeg čine dva ili više privrednih subjekata, obavezuje se Koncesoru da će izvršiti svoje obaveze u skladu sa ugovorom o koncesiji neovisno o uređenju njihovog međusobnog odnosa;
- f) ugovor o koncesiji je ugovor koji u pisanom obliku i na određeno vrijeme sklapaju Koncesor i Koncesionar o međusobnim pravima i obavezama vezanim za predmetnu koncesiju na osnovu upravnog akta koncesora o dodjeli koncesije;
- g) naknada za koncesiju je naknada koju plaća Koncesor na osnovu ugovora o koncesiji;
- h) registar ugovora o koncesijama je jedinstvena pisana i/ili elektronska evidencija svih zaključenih ugovora o koncesijama dodijeljenih na području Kantona;
- i) odluka o dodjeli koncesije je upravni akt koji donosi Koncesor na prijedlog nadležnog kantonalnog ministarstva ili nadležne službe JLS nakon provedene procedure utvrđene Zakonom;
- j) javno-privatno partnerstvo je ugovorni odnos u smislu kantonalnog propisa kojim se uređuje javno-privatno partnerstvo;
- k) poseban zakon je zakon kojim se uređuju pitanja vezana za koncesije koje se daju za djelatnosti i u područjima uređenima tim zakonom;
- l) društvo posebne namjene (u daljem tekstu: DPN) je privredno društvo osnovano isključivo za potrebe provođenja ugovora o koncesiji.
- m) izvođenje radova znači izvođenje ili projektovanje i izvođenje radova koji se odnose na jednu ili više djelatnosti iz Priloga I. ovoga Zakona ili posla ili realizacija posla, bez obzira kojim sredstvom, a koji su u skladu sa zahtjevima koje je naveo koncesor;

- n) isključivo pravo je pravo obavljanja djelatnosti koje daje nadležno tijelo, u skladu s posebnim propisom, isključivo jednom gospodarskom subjektu na osnovu propisa i upravnog akta, koje ima znatan utjecaj na mogućnost drugih privrednih subjekata da obavljaju takvu djelatnost. Djelatnosti koje se obavljaju na osnovu isključivog prava navedene su u Prilogu II. ovog Zakona;
- o) dokumentacija za nadmetanje je bilo koji dokument koji je sastavljen ili na koji Koncesor upućuje, a u kojemu se opisuju ili određuju elementi koncesije i postupka dodjele koncesije, uključujući obavijest o namjeri dodjele koncesije, tehničke i funkcionalne zahtjeve, predložene uslove koncesije, sadržaj i formu dokumenata koje podnose ponuđači, informacije o opštim primjenjivim obavezama te svu dodatnu dokumentaciju;
- p) neuredna ponuda je ponuda koja nije izrađena u skladu s tenderskom, koja sadržava odredbe koje Koncesor smatra štetnima ili za koju Koncesor osnovano smatra da nije u skladu s pravilima poštenog tržišnog natjecanja ili koja zbog formalnih ili drugih objektivnih razloga ne može biti odabrana (ponuda ponuđača koji ispunjava uslove za isključenje određene tenderskom dokumentacijom, ponuda ponuđača koji nije dokazao svoju sposobnost u skladu s tenderskom dokumentacijom, ponuda kojoj nedostaje garancija za ozbiljnost ponude, ponuda koja ne odgovara potrebama Koncesora određenim u opisu predmeta koncesije i tehničkim specifikacijama);
- q) koncesioni projekat je skup aktivnosti kojima se pokreće, ugovara i provodi koncesija na način propisan ovim Zakonom.
- r) zainteresovani privredni subjekt je pravno lice koje priprema prijedlog koncesionog projekta u ime i za račun nadležnog organa Koncesora.

Član 6. **(Načela)**

Prilikom provođenja Zakona, primjenjuju se sljedeća načela:

- (a) načelo slobodnog upravljanja javnih vlasti znači da kantonalne i lokalne vlasti, slobodno odlučuju kako najbolje upravljati općim ili javnim dobrima, izvršenjem javnih radova ili pružanjem javnih usluga, u skladu sa nadležnostima i posebnim propisima, kako bi osigurale visok stepen kvalitete, sigurnosti i cjenovne pristupačnosti;
- (b) načelo zaštite javnog interesa znači da se koncesija dodjeljuje na osnovu strateško-planske dokumentacije i nakon konsultacija javnosti;
- (c) načelo jednakog postupanja, nediskriminacije i transparentnosti znači da se koncesor prema privrednim subjektima ponaša jednako i bez diskriminacije te djeluje na transparentan i razmjeran način;
- (d) načelo zaštite okoliše znači da se koncesija dodjeljuje na način da se koncesija dodjeljuje i realizuje uz poštivanje propisa iz oblasti zaštite okoliše te posebnih propisa relevantnih za predmet koncesije;
- (e) načelo održivog razvoja znači da koncesija koja se dodjeljuje u većoj mjeri ne ugrožava biodiverzitet biljnog i životinjskog svijeta, ozonski omotač i klimatske promjene, racionalno korištenje energije i upotrebu obnovljivih izvora energije;
- (f) načelo efikasnosti podrazumijeva najbolje moguće iskorištavanje raspoloživih resursa. Vezan je za odnos korištenih resursa i izlaznih vrijednosti ostvarenih u pogledu količine, kvaliteta i rokova;
- (g) načelo efektivnosti odnosi se na ispunjavanja ciljeva postavljenim srednjoročnim planom potencijalnih koncesionih projekata.

Član 7. **(Koncesor)**

- (1) Koncesor može biti:
 - a) Vlada kantona i
 - b) Gradonačelnik/načelnik, u ime jedinice lokalne samouprave.
- (2) Kada je Koncesor Vlada Kantona, sve pripremne radnje za dodjelu koncesije i postupak dodjele koncesije, osim donošenja odluke o dodjeli koncesije, odluke o izmjeni odluke o dodjeli koncesije, odluke o poništenju postupka dodjele koncesije, odnosno odluke o raskidu ugovora o koncesiji, kao i ostale tehničke i stručne poslove Koncesora provodi Direkcija za koncesije.
- (3) Kada je Koncesor gradonačelnik/načelnik, u ime jedinice lokalne samouprave, sve pripremne radnje za dodjelu koncesije i postupak dodjele koncesije, osim donošenja odluke o dodjeli koncesije, odluke o izmjeni odluke o dodjeli koncesije, odluke o poništenju postupka dodjele koncesije, odnosno odluke o raskidu ugovora o koncesiji, kao i ostale tehničke i stručne poslove Koncesora, provodi nadležno upravno tijelo jedinice samouprave.
- (4) Sve fizičke osobe uključene u postupak dodjele koncesije ili koje mogu utjecati na ishod postupka dodjele koncesije ne smiju imati direktnih i/ili indirektnih ličnih interesa u bilo kojoj aktivnosti koja bi dovela do sukoba tih interesa s njihovim dužnostima.

Član 8. **(Predmet i područja koncesije)**

- (1) Predmet koncesije, u smislu ovog Zakona, su opća ili javna dobra, javni radovi i javne usluge iz nadležnosti Koncesora.
- (2) Iznimno od stava (1) ovog člana, predmet koncesije ne može biti korištenje vode za vodosnabdjevanje i druga opća ili javna dobra utvrđenim posebnim propisima.
- (3) Područje koncesije je djelatnost na koju upućuje predmet koncesije u skladu sa Standardnom klasifikacijom djelatnosti.
- (4) Koncesija u područjima korištenja odnosno djelatnostima vezanim za obnovljive prirodne resurse strateški su interes Kantona.

Član 9. **Izuzeća od primjene Zakona**

Ovaj se Zakon ne primjenjuje na:

- a) koncesiju koja je izuzeta na osnovu propisa Kantona, Federacije Bosne i Hercegovine, i Bosne i Hercegovine;
- b) koncesiju za neprivredne djelatnosti od opšteg interesa: između javnih tijela (npr. javna preduzeća) i za potrebe javnih projekata (npr. za korištenje općeg ili javnog dobra u javnim projektima ili za projekte javno-privatnog partnerstva);
- c) koncesiju za javne radove i koncesiju za javne usluge čije je trajanje duže od 10 godina, smatraju se koncesijama sa obilježjima javno-privatnog partnerstva i dodjeljuju se u skladu sa kantonalnim propisima kojim se uređuje javno-privatno partnerstvo
- d) koncesiju za javne radove i koncesiju za javne usluge čije je trajanje kraće od pet godina, dodjeljuju se u skladu sa posebnim propisima.

Član 10. **Imovinskoopravni odnosi**

- (1) Ako je Koncesor vlasnik nekretnine na kojoj će se obavljati djelatnost za koju se namjerava dodjeliti koncesija, Koncesionar stiče i pravo na korištenje te nekretnine dok traje koncesija, i to u onom obimu koji je nužan za izvršavanje koncesije i na onom dijelu nekretnine na kojem će koncesija najmanje opterećivati nekretninu, odnosno umanjivati njezinu vrijednost, osim ako

Koncesor ili nadležni organ Koncesora, ili drugo javno tijelo koje na osnovu posebnog zakona upravlja, odnosno raspolaže nekretninama u vlasništvu Koncesora ne odluči drukčije.

- (2) Ako je za izvršavanje koncesije nužan prolaz ili provoz vozilima bez tereta ili s teretima ili druga služnost na nekretnini u javnom vlasništvu ili u vlasništvu Koncesora, Koncesionar stiče i pravo služnosti prolaza, odnosno provoza svim vozilima sa svim teretima ili drugu služnost na toj nekretnini, osim ako Koncesor ili nadležni organ Koncesora, ili drugo javno tijelo koje na osnovu posebnog zakona upravlja, odnosno raspolaže nekretninama u javnom vlasništvu ne odluči drukčije.
- (3) Nadležni organ Koncesora je dužan u postupku pripremnih radnji zatražiti od Koncesora ili drugog javnog tijela koje na osnovu posebnog zakona upravlja, odnosno raspolaže nekretninama u javnom vlasništvu saglasnost da se na zemljištu u javnom vlasništvu, u svrhu ostvarivanja koncesije, raspolaže na način iz stavova (1) i (2) ovog člana.
- (4) U slučaju da tijelo iz stava (3) ovoga člana uskrati dodjela saglasnosti, postupak dodjele koncesije se obustavlja.
- (5) Koncesionar za stečeno pravo na korištenje nekretnine, odnosno pravo služnosti iz stavova (1) i (2) ovoga člana, uz naknadu za koncesiju, plaća i drugu naknadu u skladu s posebnim propisima.
- (6) Odredba o pravu na korištenje nekretnine, odnosno pravu služnosti Koncesionara u slučaju iz stavova (1) i (2) ovoga člana, kao i visina naknade iz stava (5) ovoga člana, sastavni je dio tenderske dokumentacije u postupku dodjele koncesije, osim ako zbog posebnosti koncesije nije drukčije propisano ovim Zakonom ili posebnim propisom.
- (7) Ako nekretnina na kojoj će se obavljati djelatnost za koju se namjerava dodjeliti koncesija nije u javnom vlasništvu, nadležni organ Koncesora dužan je, prije pokretanja postupka dodjele koncesije, obezbjediti pisanu saglasnost vlasnika nekretnine uz navođenje osnovnih uslova za uređenje imovinsko-pravnih odnosa sa budućim Koncesionarom.
- (8) U slučaju iz stava (7) ovog člana, nadležni organ Koncesora dužan je u tenderskoj dokumentaciji navesti da je prije sklapanja ugovora o koncesiji budući Koncesionar dužan urediti imovinsko-pravne odnose sa vlasnikom nekretnine i propisati rok u kojem se budućem Koncesionaru ostavlja da uredi imovinsko-pravne odnose sa vlasnikom nekretnine.
- (9) Rok iz stava (8) ovog člana ne može biti duži od dvije godine od dana donošenja Odluke o izboru Koncesionara.
- (10) U slučaju da budući Koncesionar ne uredi imovinsko-pravne odnose u roku iz stava (9) ovog člana, postupak dodjele koncesije se obustavlja.

Član 11.

(Direkcija za koncesije)

- (1) Za potrebe provođenja ovog Zakona iz nadležnosti Kantona, formira se Direkcija za koncesije kao samostalna upravna organizacija.
- (2) Direkcija za koncesije nadležna je za:
 - a) provođenje svih pripremnih radnji za dodjelu koncesije i postupak dodjele koncesije, osim donošenja odluke o dodjeli koncesije, odluke o izmjeni odluke o dodjeli koncesije, odluke o poništenju postupka dodjele koncesije, odnosno odluke o raskidu ugovora o koncesiji, kao i ostale tehničke i stručne poslove;
 - b) pripremu, provođenje, nadzor i praćenje ugovora o koncesiji;
 - c) pripremu, vođenje i promociju Kataloga potencijalnih koncesionih projekata;
 - d) uspostavljanje i vođenje Registra koncesija;
 - e) kontinuirano praćenje, ocjenjivanje i izvještavanje o provođenju ovog Zakona prema Vladi
 - f) druge poslove propisane ovim Zakonom i posebnim zakonima koji regulišu oblast koncesija.
- (3) JLS mogu Odlukom o prenosu ovlaštenja prenijeti postupke dodjele koncesije iz svoje nadležnosti Direkciji za koncesije.

POGLAVLJE II. PRIPREMNE RADNJE ZA DODJELU KONCESIJE

Član 12.

(Pripreme radnje)

- (4) Pripremnim radnjama za dodjele koncesije smatraju se sve aktivnosti koje se provode radi dodjele koncesije, a prethode početku postupka dodjele koncesije.
- (5) Pripreme radnje provodi nadležni organ Koncesora u skladu s ovim Zakonom, posebnim zakonom te ostalim propisima ovisno o vrsti i predmetu koncesije.
- (6) Pripremnim radnjama smatraju se naročito:
 - a) donošenje plana potencijalnih koncesionih projekata;
 - b) imenovanje stručne komisije za koncesiju;
 - c) priprema prijedloga koncesionog projekta (studija opravdanosti i procjena vrijednosti koncesije);
 - d) donošenje odluke o pokretanju postupka dodjele koncesije;
 - e) izrada tenderske dokumentacije.

Član 13.

(Plan potencijalnih koncesionih projekata)

- (1) Koncesor koji ima namjeru dodjeljivati koncesiju iz svoje nadležnosti, dužan je izraditi srednjoročni i godišnji plan potencijalnih koncesionih projekata na način propisan ovim Zakonom.
- (2) Koncesioni projekat koja se može uvrstiti u srednjoročni i godišnji plan potencijalnih koncesionih projekata, minimalno ispunjava sljedeće kriterije:
 - a) Predmet koncesije je u nadležnosti Koncesora;
 - b) Koncesioni projekat je u skladu sa strateško-planskom dokumentacijom Koncesora;
 - c) Za predmet koncesije ne vode se upravni ili sudski postupci;
- (3) Srednjoročni plan potencijalnih koncesionih projekata sastoji se iz:
 - a) narativnog dijela, u kojem se navode područja i obim planiranih koncesija, očekivani društveni, ekonomski i ekološki uticaji planiranih koncesija, kao i drugi elementi koji su od značaja za učinkovito upravljanje koncesijama;
 - b) tabelarnog dijela, u kojem se navode pojedinačni potencijalni koncesioni projekti.
- (4) Plan iz stava (3) ovog člana obuhvata sve potencijalne koncesije iz nadležnosti Koncesora.
- (5) Na prijedlog nadležnog organa Koncesora, plan iz stava (3) ovog člana za koncesije iz nadležnosti kantona donosi Skupština Kantona, a za koncesije iz nadležnosti JLS Gradsko/Općinsko Vijeće u roku od 60 dana od dana donošenja okvirnog budžeta Koncesora, a najkasnije do 28. februara tekuće godine.
- (6) Prilikom izrade prijedloga plana iz stava (3) ovog člana, nadležni organ Koncesora je dužan provesti javnu raspravu o nacrtu plana, koja ne može trajati kraće od 30 dana;
- (7) Izmjene i dopune važećeg plana iz stava (3) ovo člana vrše se po istoj proceduri propisanoj ovim članom.
- (8) Godišnji plan potencijalnih koncesionih projekata izvodi se iz važećeg srednjoročnog plana potencijalnih koncesionih projekata.
- (9) Plan iz stava (8) ovog člana usvaja Koncesor u roku od 60 dana od dana donošenja godišnjeg budžeta Koncesora, a najkasnije do 28. februara tekuće godine.
- (10) Koncesor je obavezan u roku od 15 dana od dana donošenja planova iz stava (3) i stava (7) ovog člana, iste objaviti na svojoj web-stranici i dostaviti Direkciji za koncesije.
- (11) Direkcija za koncesije, na osnovu dostavljenih godišnjih i srednjoročnih planova potencijalnih koncesionih projekata, priprema i objavljuje na web stranici Vlade Katalog potencijalnih koncesionih projekata Zeničko-dobojskog kantona do kraja prvog kvartala tekuće godine.

- (12) Katalog potencijalnih koncesionih projekata se može prevesti minimalno na engleski ili još jedan zvanični jezik Europske Unije.
- (13) Vlada Kantona će donijeti Uredbu o koncesijama, kojom će propisati obrasce za pripremu srednjoročnih i godišnjih planova potencijalnih koncesionih projekata, obrazac izjave o nepostojanju direktnih ili indirektnih ličnih interesa i čuvanju povjerljivost informacija, Postupak i uslovi angažovanja spoljnih saradnika za izradu prijedloga koncesionog projekta, postupak i uslovi izrade prijedloga koncesionog projekta od strane zainteresovanog privrednog subjekta, obrazac odluke o poništenju postupka dodjele koncesije, sadržaj i način pripreme godišnje informacije o koncesijama.

Član 14.

(Stručna komisija za koncesiju)

- (1) Nakon donošenja planova potencijalnih koncesionih projekata iz člana 13. ovog Zakona, na prijedlog nadležnog organa Koncesora, Koncesor rješenjem imenuje stručnu komisiju za koncesiju.
- (2) Stručna komisija iz stava (1) ovog člana imenuje se za svaki pojedinačan potencijalni koncesioni projekat koji se priprema za javni poziv odnosno koji se dodjeljuje na zahtjev u skladu sa članom 38. ovog Zakona.
- (3) Članovi stručne komisije pravne, ekonomske, tehničke i druge odgovarajuće struke, ovisno o predmetu i obilježjima koncesije. Članovi stručne komisije za koncesiju ne moraju biti zaposlenici Koncesora.
- (4) Broj članova stručne komisije za koncesiju je neparan, s najmanje tri člana, a najviše pet članova.
- (5) Članovi stručne komisije i rukovodilac nadležnog organa Koncesora moraju odmah po donošenju rješenja iz stava (1) ovog člana potpisati izjavu kojom garantuju nepostojanju direktnih ili indirektnih ličnih interesa i povjerljivost informacija u bilo kojoj aktivnosti postupka dodjele koncesije.
- (6) Obrazac izjave iz stava (4) propisan je Uredbom iz člana 13, stav (13).
- (7) Na zahtjev nadležnog organa Koncesora, kanton ili jedinica lokalne samouprave može predložiti jednog člana stručne komisije za koncesije, zavisno od predmeta koncesije.
- (8) Zadaci stručne komisije za koncesiju su:
 - a) saradnja s nadležnim organom Koncesora na pripremi prijedloga koncesionog projekta, na pripremi javnog poziva i tenderske dokumentacije, na pripremi utvrđivanja uslova za dodjelu koncesije određenih posebnim zakonom i izradi tenderske dokumentacije te pri definisanju uslova sposobnosti i kriterija za odabir najpovoljnije ponude;
 - b) davanje mišljenje na usklađenost prijedloga koncesionog projekta (studije opravdanosti i procjene vrijednosti koncesije) sa ovim Zakonom i posebnim propisima;
 - c) utvrđivanje prijedloga odluke o pokretanju postupka dodjele koncesije;
 - d) pregled i ocjena pristiglih ponuda, u skladu sa ovim Zakonom;
 - e) utvrđivanje prijedloga odluke o dodjeli koncesije sa obrazloženjem;
 - f) predlaganje vrste i vrijednosti pojedine garancije;
 - g) obavljanje svih ostalih radnji potrebnih za provedbu postupka dodjele koncesije.
- (9) Stručna komisija za koncesiju o svom radu vodi zapisnik koji potpisuju svi članovi stručne komisije.
- (10) Članovima stručne komisije za koncesije pripada naknada za njihov angažman u skladu sa posebnim propisima. Visina naknade utvrđuje se aktom Koncesora prilikom imenovanja članova stručne komisije.
- (11) Stručna komisija za koncesiju prestaje s radom sklapanjem ugovora o koncesiji odnosno izvršnošću odluke o poništenju postupka dodjele koncesije.

Član 15.

(Rok na koji se daje koncesija)

- (1) Ugovor o koncesiji sklapa se na određeno vrijeme.
- (2) Koncesor određuje rok na koji se daje koncesija na osnovu studije opravdanosti, na način da taj rok ne ograničava tržišno natjecanje više nego što je to neophodno kako bi se osigurala amortizacija stvarne vrijednosti ulaganja Koncesionara i razuman povrat uloženog kapitala, istovremeno uzimajući u obzir troškove i rizike koje Koncesionar preuzima za vrijeme trajanja koncesije.
- (3) Rok na koji se daje koncesija ne može biti kraći od 5 godina niti duži od 30 godina osim ako nije drugačije određeno odredbama posebnih zakona.
- (4) Rok na koji je koncesija data računa se od dana sklapanja ugovora o koncesiji, odnosno od dana stupanja na snagu ugovora o koncesiji, ako se taj dan razlikuje od dana sklapanja ugovora o koncesiji.
- (5) Rok na koji je koncesija data može se produžiti ako je produženje nužno kao posljedica izmjena ugovora o koncesiji u skladu s ovim Zakonom. Produženje ne može biti duže od polovine prvobitno ugovorenog roka.
- (6) Kada je potrebno osigurati neprekinuto obavljanje djelatnosti, nadležni organ Koncesora, na zahtjev Koncesionara, pokreće novi postupak dodjele koncesije za istu djelatnost najmanje 12 mjeseci prije isteka roka na koji je koncesija dana.

Član 16.

(Prijedlog koncesionog projekta)

- (1) Prijedlog koncesionog projekta sastoji se iz:
 - a) studije opravdanosti, i
 - b) procjene vrijednosti koncesije.
- (2) Prijedlog koncesionog projekta obezbjeđuje nadležni organ Koncesora, uz podršku stručne komisije za koncesiju.
- (3) Za potrebe izrade koncesionog projekta, nadležni organ Koncesora može angažovati spoljne saradnike i/ili sklopiti ugovor o saradnji sa zainteresovanim privrednim subjektom.
- (4) Postupak i uslovi angažovanja spoljnih saradnika za izradu prijedloga koncesionog projekta i postupak i uslovi izrade prijedloga koncesionog projekta od strane zainteresovanog privrednog subjekta propisani su Uredbom iz člana 13. stav (13) ovog Zakona.

Član 17.

(Studija opravdanosti)

- (1) Studijom opravdanosti dodjele koncesije posebno se uzimaju u obzir javni interes, uticaj na okoliš, zaštita prirode i kulturnih dobara, finansijski učinci koncesije na budžet Koncesora, te usklađenost sa strateško-planskom dokumentacijom Koncesora, uključujući planove za dodjelu koncesija iz člana 13. ovoga Zakona.
- (2) Kod koncesije za usluge i koncesije za radove koja ima obilježja javno-privatnog partnerstva, Koncesor umjesto studije opravdanosti dodjele koncesije izrađuje prijedlog projekta javno-privatnog partnerstva u skladu sa kantonalnim propisima kojima se uređuje javno-privatno partnerstvo.
- (3) Sva pitanja vezana za studiju opravdanosti dodjele koncesije koja nisu uređena ovim Zakonom uređuju se posebnim zakonom.

Član 18.

(Sadržaj studije opravdanosti)

- (1) Studija opravdanosti dodjele koncesije sastoji se naročito od izvršnog sažetka (kratak pregled), opšteg dijela, tehničke, finansijske, ekonomske i pravne analize, procjene vrijednosti koncesije, a po potrebi i elaborata zaštite okoliša u skladu sa posebnim propisom te pripadajućih priloga, zaključaka i preporuka.
- (2) Izvršni sažetak studije opravdanosti dodjele koncesije sadržava naročito: opis predmeta i svrhe/cilja koncesije, popis i obrazloženje primjene propisa koji se primjenjuju na dodjelu koncesije, pregled osnovnih zaključaka studije opravdanosti dodjele koncesije, izvore informacija i podataka te podatke o autorima studije opravdanosti dodjele koncesije.
- (3) Opšti dio studije opravdanosti dodjele koncesije sadržava naročito: određenje vrste i predmeta koncesije, mogućnost dodjele koncesije na zahtjev, uslove pod kojima se koncesija dodjeljuje, načela upravljanja i nadzora nad koncesijom, slijed provedbe postupka dodjele koncesije i provedbe ugovora o koncesiji.
- (4) Tehnička analiza studije opravdanosti dodjele koncesije, bazirana na idejnom projektu izrađenom u skladu sa posebnim zakonima koji se odnose na predmet koncesije, sadržava naročito: opis djelatnosti za koji će se koncesija koristiti, opis područjakoja se daje u koncesiju, razradu tehničkih uslova i elemenata vezanih za projektovanje i građenje i/ili rekonstrukciju, opremanje i održavanje građevine koja je predmet koncesije, tehničke i ostale preduslove za početak građenja, procjenu kapitalnih troškova i troškova upravljanja i održavanja građevine.
- (5) Osim ako je to opravdano predmetom ugovora o koncesiji, tehnički i funkcionalni zahtjevi ne smiju upućivati na određenu marku ili izvor ili određeni proces koji karakterizira proizvode ili usluge koje pruža određeni privredni subjekt ili na zaštitne znakove, patente, vrste ili određenu proizvodnju ako bi to imalo učinak pogodovanja ili isključivanja određenih poduzetnika ili određenih proizvoda. Takva je uputa dopuštena, u iznimnim slučajevima, kada nije moguće dovoljno precizno i razumljivo opisati predmet ugovora o koncesiji. Uz takvu uputu treba navesti riječi »ili jednakovrijedan«.
- (6) Finansijska i ekonomska analiza studije opravdanosti dodjele koncesije sadržava naročito: analizu troškova i koristi koncesije u odnosu na budžet Koncesora, odnosno budžet Federacije Bosne i Hercegovine i/ili budžet jedinice lokalne samouprave, te finansijske izvodivosti koncesije u odnosu na Koncesionara, u skladu sa standardima struke i međunarodnim standardima.
- (7) Pravna analiza studije opravdanosti dodjele koncesije sadržava naročito: popis i obrazloženje primjene propisa koji se primjenjuju na dodjela koncesije, utvrđenje i analizu imovinsko-pravnih pitanja te preporuke vezane za uslove dodjele koncesije, posebne uslove koje Koncesor i Koncesionar moraju ispuniti, razloge/uslove za i posljedice raskida ugovora o koncesiji, garancije za provedbu ugovora o koncesiji, analizu prava finansijskih institucija i druga pitanja finansijske podrške koncesije, pitanja prenosa objekta s Koncesionara na Koncesora te pravnu zaštitu.

Član 19.

(Procjena vrijednosti koncesije)

- (1) Procjena vrijednost koncesije izražava se kao ukupna vrijednost predmeta koncesije, u konvertibilnim markama bez poreza na dodanu vrijednost, uključujući sve predvidljive izmjene ugovora o koncesiji i maksimalnu vrijednost izmjena.
- (2) Procijenjena vrijednost koncesije izračunava se na osnovu podataka iz studije opravdanosti dodjele koncesije.
- (3) Procijenjena vrijednosti koncesije izračunava se kao procijenjeni ukupni prihod, bez poreza na dodanu vrijednost, koji će Koncesionar, postupajući s pažnjom dobrog domaćina, ostvariti na osnovu ugovora o koncesiji za vrijeme trajanja koncesije.

- (4) Ako Koncesor predviđa subvencije budućem Koncesionaru u skladu s posebnim zakonom, uzima ih u obzir prilikom izračuna procijenjene vrijednosti koncesije.
- (5) Pri izračunu procijenjene vrijednosti koncesije koriste se tržišne cijene u trenutku izračuna, ako nije drugačije uređeno posebnim zakonom.
- (6) Pri izračunavanja procijenjene vrijednosti koncesije, Koncesor, ako je moguće, posebno uzima u obzir:
 - a) vrijednost dodijeljenih sredstava ili bilo koju drugu financijsku prednost, u bilo kojem obliku, od trećih strana za izvršenje koncesije
 - b) prihod od prodaje bilo kakve imovine koja je dio predmeta koncesije
 - c) vrijednost cjelokupne robe i usluga koje je Koncesor stavio na raspolaganje koncesionaru pod uvjetom da su nužne za izvođenje radova ili pružanje usluga
 - d) plaćanja od strane Koncesora ili bilo kojeg tijela javne vlasti odnosno bilo kakvu financijsku prednost u bilo kojem obliku koju je jedno od navedenih tijela dodijelilo Koncesionaru, uključujući naknadu za usklađivanje s obavezom javne usluge i subvencioniranje javnog ulaganja.
- (7) Na sva pitanja izračuna procijenjene vrijednosti koncesije koja nisu uređena ovim članom ili ih nije moguće na odgovarajući način provesti, primjenjuju se i odredbe posebnog zakona.

Član 20.

(Odluka o pokretanju postupka dodjele koncesije)

- (1) Nadležni organi Koncesora dostavlja prijedlog koncesionog projekta stručnoj komisiji za dodjelu koncesije na mišljenje o usaglašenosti sa Zakonom.
- (2) Stručna komisija priprema prijedlog Odluke o pokretanju postupka dodjele koncesije, koji se putem nadležnog organa Koncesora dostavlja Koncesoru u roku od 30 dana od dana dostavljanja prijedloga koncesionog projekta.
- (3) Odluka iz stava (2) ovog člana sadrži elemente potrebne za pripremu javnog poziva u skladu sa ovim Zakonom, a obavezno sadrži:
 - a) zakonski osnov
 - b) vrstu i predmet koncesije
 - c) prirodu i opseg djelatnosti koncesije
 - d) mjesto, odnosno područje obavljanja djelatnosti koncesije
 - e) rok trajanja koncesije
 - f) procijenjenu vrijednost koncesije
 - g) uslovi pravne i poslovne, finansijske, tehničke i stručne sposobnosti, u skladu s odredbama posebnog zakona te dokaze i podatke kojima privredni subjekt dokazuje ispunjenje tih uslova
 - h) vrstu i vrijednost garancije za ozbiljnost ponude koje su ponuditelji dužni dostaviti
 - i) kriteriji za odabir ponude
 - j) Jednokratna naknada za učešće u javnom pozivu
- (4) Odluka iz stava (2) može sadržavati i dodatne elemente zavisno od predmeta koncesije.

Član 21.

(Tenderska dokumentacija)

- (1) Nadležni organ Koncesora izrađuje nacrt tenderske dokumentacije na jednom od službenih jezika Bosne i Hercegovine i dostavlja na mišljenje o usklađenosti sa ovim Zakonom stručnoj komisiji za koncesije u roku koji ne može biti duži od 60 dana od dana donošenja Odluke o pokretanju postupka dodjele koncesije iz člana 20. ovog Zakona.
- (2) Stručna komisija za koncesije daje mišljenje iz stava (1) ovog člana u roku koji ne može biti duži od 30 dana od dana primanja zahtjeva iz stava (1) ovog člana.

- (3) Na prijedlog nadležnog organa Koncesora, Koncesor donosi odluku o prihvatanju tenderske dokumentacije kojom propisuje rok za objavu javnog poziva za dodjelu koncesije.
- (4) Rok iz stava (3) ovog člana ne može biti duži od 60 dana od dana donošenja odluke.
- (5) Koncesor putem svoje web stranice omogućava neograničen, potpuno neposredan i besplatan pristup tenderskoj dokumentaciji od dana objave javnog poziva.

Član 22.

(Sadržaj tenderske dokumentacije)

- (1) Tenderska dokumentacija sadržava sve potrebne podatke koji privrednom subjektu omogućavaju izradu ponude, uključujući:
 - a) opće podatke (naziv i sjedište Koncesora, ID broj, broj telefona, broj telefaksa, internetsku adresu, adresu elektronske pošte, osobu ili službu zaduženu za kontakt, procijenjena vrijednost koncesije, vrsta koncesije)
 - b) podatke o predmetu koncesije (opis predmeta koncesije, tehničke specifikacije, predviđeno trajanje ugovora o koncesiji)
 - c) razloge za isključenje privrednog subjekta, uslove pravne i poslovne, financijske, tehničke i stručne sposobnosti, te dokaze i podatke kojima privredni subjekt dokazuje ispunjenje tih uslova
 - d) podatke o ponudi (sadržaj i način izrade, način dostave, način određivanja cijene, odnosno naknade za koncesiju, kriterij za odabir ponude, rok valjanosti ponude)
 - e) ostale podatke (podaci o terminu neposrednog pregleda dokumenata koji potkrepljuju dokumentaciju za nadmetanje, odredbe koje se odnose na ponuđača, datum, vrijeme i mjesto dostave ponuda i otvaranja ponuda, dokument koji će se nakon završetka postupka dodjele koncesije vratiti ponuđaču, ako je primjenjivo, podaci o javnim tijelima od kojih ponuđač može dobiti informaciju o obavezama koje se odnose na poreze, zaštitu okoliša, odredbe o zaštiti radnoga mjesta i radne uslove koje su na snazi u području koncesije, rok za donošenje odluke o dodjeli koncesije, rok, način i uslovi plaćanja naknade za koncesiju ili plaćanja od strane Koncesora, uslovi i zahtjevi koji moraju biti ispunjeni u skladu s posebnim propisima ili stručnim pravilima, pravo korištenja nekretnine, odnosno pravo služnosti i naknada za nekretninu, navod o primjeni uzanci (trgovačkih običaja), ako će se primjenjivati, naziv i adresa žalbenog tijela, i drugi podaci koje Koncesor smatra potrebnima)
 - f) vrstu, sredstvo, uslove i rokove za dostavu garancija za ozbiljnost ponude i provedbu ugovora, uslove i rokove za zadržavanje garancija za ozbiljnost ponude i provedbu ugovora, a koji su prilagođeni obimu i vrijednosti ugovora o koncesiji i predmeta koncesije te čija je naplata izvjesna
 - g) uslove i rokove za zadržavanje garancije za provedbu ugovora po isteku ugovora o koncesiji
 - h) nacrt ugovora o koncesiji
 - i) navod mogućih izmjena ugovora o koncesiji.
- (2) Ako Koncesor ili drugo javno tijelo na osnovu posebnog propisa ima pravo ili određivanja cijene koju Koncesionaru za njegove usluge plaćaju krajnji korisnici ili davanje saglasnosti Koncesionaru na cjenovnik njegovih usluga, takvo pravo, kao dio budućeg ugovora o koncesiji, sastavni je dio tenderske dokumentacije.
- (3) Ponuđač je obavezan osnovati društvo posebne namjene u skladu sa ovim Zakonom, u tenderskoj dokumentaciji se jasno navodi određenje oblika privrednog društva, minimalnog osnovnog kapitala, obaveze ponuđača u odnosu na osnivanje društva te drugi uslovi, obaveze i odnosi ponuđača, odnosno Koncesionara i Koncesora.
- (4) Opis predmeta koncesije (tehničke specifikacije) ne smije ograničavati tržišno nadmetanje u postupku dodjele koncesije. Na tehničke specifikacije primjenjuju se i posebni zakoni
- (5) Tenderska dokumentacija izrađuje se na način koji omogućava usporedivost ponuda za dodjelu predmetne koncesije.

- (6) Tenderska dokumentacija može sadržavati obrasce zahtijevanih dokumenata, izjava i druge obrasce.

Član 23.

(Garancija za ozbiljnost ponude)

- (1) Koncesor u tenderskoj dokumentaciji navodi sredstvo i uslove garancije za ozbiljnost ponude koje ponuđač mora dostaviti.
- (2) Vrsta i vrijednost garancije određuju se u zavisnosti o posebnostima vrste i predmeta koncesije, a u skladu s procjenom Koncesora.
- (3) Stručna komisija iz člana 14. ovoga Zakona predlaže vrstu i vrijednost garancije.
- (4) Trajanje garancije za ozbiljnost ponude ne smije biti kraće od roka valjanosti ponude.
- (5) Koncesor utvrđuje visinu garancije za ozbiljnost ponude u apsolutnom iznosu. Garancija za ozbiljnost ponude, osim u opravdanim slučajevima, ne može iznositi više od 5 % procijenjene vrijednosti koncesije.
- (6) Ako istekne rok valjanosti ponude te je ponuđač produži na zahtjev nadležnog organa Koncesora, odgovarajuće će se produžiti i garancija za ozbiljnost ponude u skladu sa zahtjevima Koncesora, o čemu nadležni organ Koncesora pisanim putem obavještava ponuđača.
- (7) Koncesor ponuđaču određuje primjereni rok za dostavu produžene garancije.
- (8) Koncesor odabranom najpovoljnijem ponuđaču vraća garanciju za ozbiljnost ponude neposredno nakon sklapanja ugovora o koncesiji, a ostalim ponuđačima vraća garanciju za ozbiljnost ponude neposredno nakon završetka postupka dodjele koncesije, a kopiju garancija zadržava i arhivira.
- (9) Koncesor aktivira garanciju za ozbiljnost te ponude u slučaju odustanka ponuđača od obavezujuće ponude.

Član 24.

(Razlozi za isključenje privrednog subjekta)

Koncesor je obvezan isključiti privredni subjekt iz postupka dodjele koncesije u bilo kojem trenutku na način i zbog razloga navedenih u Zakonu o javnoj nabavci.

Član 25.

(Mješoviti ugovori)

- (1) Koncesija koja obuhvata više vrsta i/ili predmeta koncesije, a koji se objektivno ne mogu razdvojiti, daje se u skladu s odredbama postupka dodjele primjenjivim na glavni predmet koncesije.
- (2) Kada su predmeti koncesije objektivno odvojivi, Koncesor može provesti odvojene postupke dodjele koncesije za pojedinačne dijelove.

Član 26.

(Razmjena informacija između Koncesora i privrednog subjekta)

- (1) Tokom postupka dodjele koncesije Koncesor može razmjenjivati informacije s privrednim subjektom koristeći jedno ili više sljedećih sredstava komunikacije:
- a) elektronska sredstva (email);
 - b) poštu ili telefaks;
 - c) usmenu komunikaciju, o čemu je Koncesor dužan napraviti službenu zabilješku;
 - d) osobnu dostavu ovjerenu potvrdom o prijemu.

(2) Koncesor pri svakoj komunikaciji, razmjeni i pohranjivanju informacija osigurava očuvanje cjelovitosti podataka te povjerljivost zahtjeva za sudjelovanje i ponuda.

Član 27.

(Dostupnost tenderske dokumentacije)

(1) Koncesor putem omogućava neograničen, potpuno neposredan i besplatan pristup tenderskoj dokumentaciji na svojoj web stranici od dana objave javnog poziva.

(2) Ako se u opravdanim okolnostima, a zbog izuzetnih sigurnosnih ili tehničkih razloga ili zbog naročito osjetljive prirode poslovne informacije koja zahtijeva vrlo visoku razinu zaštite, ne može omogućiti neograničen, potpuno neposredan i besplatan pristup određenim tenderskim dokumentima na način iz stava (1) ovog člana, Koncesor u javnom pozivu za dodjelu koncesije navodi da način na koji se može preuzeti tenderska dokumentacija i da se rok za dostavu ponuda produžava.

(3) Najkasnije osmoga dana prije roka određenog za dostavu ponuda moguće je podnijeti zahtjev za objašnjenja i izmjene vezane uz tendersku dokumentaciju. Nadležni organ Koncesora svim ponuđačima stavlja na raspolaganje dodatne informacije u vezi sa tenderskom dokumentacijom najkasnije šestoga dana prije isteka roka za dostavu ponuda.

(4) Ako Koncesor za vrijeme roka za dostavu ponuda mijenja tendersku dokumentaciju, osigurava dostupnost izmjena svim zainteresovanim privrednim subjektima na isti način kao i osnovnu tendersku dokumentaciju, te osigurava da privredni subjekti od izmjene imaju najmanje 15 dana za dostavu ponude.

POGLAVLJE III. POSTUPAK DODJELE KONCESIJE

Član 28.

(Postupak dodjele koncesije)

(1) Postupak za dodjelu koncesije započinje donošenjem Odluke o pokretanju postupka dodjele koncesije iz člana 20. ovog Zakona, a završava zaključenjem ugovora o dodjeli koncesije ili donošenjem Odluke o poništenju postupka dodjele koncesije.

(2) Koncesija se dodjeljuje putem javnog poziva.

(3) Iznimno od stava (2) ovog člana, koncesija se može dodijeliti na zahtjev u skladu s članom 38. ovoga Zakona.

Član 29.

(Javni poziv)

(1) Nadležni organ Koncesora objavljuje javni poziv za dodjelu koncesije najkasnije u roku od 30 dana od dana donošenja Odluke o pokretanju postupka dodjele koncesije.

(2) Javni poziv za dodjelu koncesije minimalno sadrži sljedeće podatke:

- a. naziv, adresu, telefonski broj, broj telefaksa i email adresu Koncesora
- b. vrstu i predmet koncesije
- c. prirodu i obim djelatnosti koncesije
- d. mjesto, odnosno područje obavljanja djelatnosti koncesije
- e. rok trajanja koncesije
- f. procijenjena vrijednost koncesije
- g. minimalna koncesiona naknada (jednokratna i kontinuirana)
- h. rok za dostavu ponuda
- i. adresu na koju se moraju poslati ponude
- j. mjesto i vrijeme otvaranja ponuda
- k. razloge isključenja privrednog subjekta

- l. uslove pravne i poslovne, finansijske, tehničke i stručne sposobnosti, u skladu s odredbama posebnog zakona te dokaze i podatke kojima privredni subjekt dokazuje ispunjenje tih uslova
 - m. vrstu i vrijednost garancije za ozbiljnost ponude
 - n. kriterij za odabir ponude
 - o. naziv i adresu tijela nadležnog za rješavanje žalbe te podatke o rokovima za podnošenje žalbe na odluku ili izmjenu odluke o izboru najpovoljnije ponuđača odnosno odluku ili izmjenu odluke o poništenju postupka dodjele koncesije.
 - p. uslovi preuzimanja tenderske dokumentacije, u slučaju primjene člana 27. stav (2)
 - q. nacrt ugovora o koncesiji
- (3) Javni poziv za dodjelu koncesije može sadržavati i druge podatke u skladu s odredbama ovog Zakona i posebnih zakona.
- (4) Ako su za vrijeme roka za dostavu ponuda potrebni ispravci javnog poziva, rok za dostavu ponuda produžava se za dodatnih 15 dana.
- (5) Javni poziv i ispravak javnog poziva za dodjelu koncesije objavljuju se u cijelosti na jednom od službenih jezika Bosne i Hercegovine, a cijene se izražavaju u konvertibilnim markama.
- (6) Javni poziv za dodjelu koncesije i ispravak javnog poziva za dodjelu koncesije objavljuju se istovremeno na način koji će osigurati maksimalnu distribuciju informacije do potencijalnih ponuđača, a minimalno na web stranici Koncesora, i u dva dnevna lista koji su dostupni na teritoriji cijele Bosne i Hercegovine.

Član 30.

(Ponuda)

- (1) Ponuđač dostavlja svoju ponudu u roku određenom u javnom pozivu za dodjelu koncesije, u pisanom obliku u zatvorenoj koverti, s naznakom naziva predmeta koncesije iz javnog poziva na koji se odnosi, s naznakom »ne otvaraj« i adresom ponuđača.
- (2) Rok za dostavu ponude iznosi najmanje 30 dana od dana objave javnog poziva.
- (3) Pri određivanju roka za dostavu ponuda Koncesor uzima u obzir stepen složenosti predmeta koncesije i objektivno vrijeme potrebno za sastavljanje ponude.
- (4) Ponuda je obvezujuća za ponuđača koji ju je dostavio do isteka roka valjanosti ponude.
- (5) Pri izradi ponude ponuđač se mora pridržavati zahtjeva i uslova iz tenderske dokumentacije.
- (6) Ponuda se izrađuje na jednom od službenih jezika Bosne i Hercegovine, a cijene se izražavaju u konvertibilnim markama.
- (7) U roku za dostavu ponude ponuđač može izmijeniti svoju ponudu, nadopuniti je ili od nje odustati.
- (8) Na zahtjev Koncesora, ponuđač može produžiti rok važenja svoje ponude.
- (9) Grupa ponuđača je dužna Koncesoru dostaviti akt kojim se uređuju njihovi međusobni odnosi za potrebe učešća u javnom pozivu.
- (10) U slučaju iz stava (9) ovoga člana, ponuđač odnosno grupa ponuđača mora dokazati da će imati na raspolaganju nužne resurse cijelo vrijeme trajanja ugovora o koncesiji, na primjer dostavljanjem ugovora kojim se ti privredni subjekti obavezuju staviti na raspolaganje svoje resurse cijelo vrijeme trajanja ugovora o koncesiji.
- (11) Članovi grupe ponuđača su solidarno odgovorni za provođenje ugovora o koncesiji.

Član 31.

(Otvaranje ponuda)

- (1) Otvaranje ponuda vrši stručna komisija za koncesiju.
- (2) Otvaranje ponuda započinje na mjestu i u vrijeme naznačeno u javnom pozivu.
- (3) Ponude pristigle nakon roka za dostavu ponuda vraćaju se neotvorene na adresu naznačenu na koverti.
- (4) Pravo sudjelovanja na otvaranju ponuda imaju samo ovlašteni predstavnici ponuđača.

- (5) Stručna komisija za koncesiju o otvaranju ponuda sastavlja zapisnik, kojim konstatuje formalnu ispravnost pristiglih ponuda.
- (6) Zapisnik iz stava (5) ponuđačima dostavlja na njihov pismeni zahtjev podnešen u roku od tri dana od dana otvaranja ponuda nadležnom organu Koncesora.
- (7) Koncesor može odlučiti da otvaranje ponuda bude javno što je dužan navesti u tenderskoj dokumentaciji.

Član 32.

(Pregled i ocjena ponuda)

- (1) Nakon otvaranja ponuda, stručna komisija za koncesiju pregleda i ocjenjuje ponude na osnovu uslova i kriterija iz tenderske dokumentacije.
- (2) Stručna komisija za koncesiju priprema zapisnik o pregledu i ocjeni ponuda sa preporukom o izboru ponuđača ili sa preporukom o poništenju postupka, koji u roku od sedam dana od dana otvaranja ponuda dostavlja nadležnom organu Koncesora.

Član 33.

(Odluka o izboru najboljeg ponuđača)

- (1) Na osnovu zapisnika stručne komisije za koncesiju iz člana 32. stav (2), nadležni organ Koncesora donosi odluku o izboru najpovoljnijeg ponuđača, koju u roku od sedam dana od dana prijema zapisnika, dostavlja svim ponuđačima.
- (2) Na odluku iz stava (1) ovog člana može se izjaviti žalba drugostepenoj komisiji Koncesora u roku od osam dana od dana prijema odluke.
- (3) Pokrenuti upravni spor odlaže dalji postupak dodjele koncesije do pravosnažnosti odluke iz stava (3) ovog člana.

Član 34.

(Kriterij za izbor najpovoljnije ponude)

- (1) Kriterij za izbor najpovoljnije ponude je najviša ponuđena jednokratna i kontinuirana naknada za koncesiju.
- (2) Ako je posebnim zakonom određena najniža naknada za koncesiju koju je Koncesionar dužan plaćati, u tenderskoj dokumentaciji se taj iznos navodi kao iznos iznad kojeg su ponuđači dužni iskazati svoje ponude.
- (3) Ako su dvije ili više urednih ponuda jednako rangirane, odabrat će se ponuda koja je zaprimljena ranije.

Član 35.

(Odluka o dodjeli koncesije)

- (1) Po pravosnažnosti odluke o izboru najpovoljnijeg ponuđača iz člana 33, stav (1), na prijedlog nadležnog organa Koncesora, Koncesor donosi odluku o dodjeli koncesije.
- (2) Prijedlog odluke o dodjeli koncesiji iz stava (1) ovog člana nadležni organ Koncesora dostavlja sa pratećom dokumentacijom o provedenom postupku i nacrtom ugovora u roku od 15 dana od dana pravosnažnosti odluke o izboru najpovoljnijeg ponuđača iz člana 33, stav (1).
- (3) Iznimno od stava (1) ovog člana, Koncesor može donijeti odluku o dodjeli koncesije za privredno korištenje općeg ili javnog dobra bez pregleda i ocjene ponuda, na zahtjev privrednog subjekta, u skladu s članom 38. ovoga Zakona.
- (4) Odluku o dodjeli koncesije nadležni organ Koncesora dostavlja izabranom ponuđaču odnosno privrednom subjektu iz člana 38. ovog Zakona.
- (5) Rok za razmatranje prijedloga Odluke o dodjeli koncesije ne smije biti duži od 30 dana od dana dostavljanja prijedloga odluke o dodjeli koncesije.

- (6) Odluka o dodjeli koncesije, kao i njezine izmjene, objavljuje se bez odgode u službenim novinama i na web stranici Koncesora, a najkasnije u roku od 15 dana od dana donošenja.

Član 36.

(Sadržaj odluke o dodjeli koncesije)

- (1) Odluka o dodjeli koncesije sadržava:
- a) naziv Koncesora
 - b) naziv izabranog ponuđača, odnosno podnosioca zahtjeva iz člana 38. ovoga Zakona
 - c) vrstu i predmet koncesije
 - d) priroda, obim i mjesto, odnosno područje obavljanja djelatnosti koncesije
 - e) rok na koji se dodjeljuje koncesija
 - f) osnovna prava i obaveze Koncesora i izabranog ponuđača
 - g) posebni uslovi kojima za vrijeme trajanja koncesije mora udovoljavati izabrani ponuđač, odnosno podnosioc zahtjeva iz člana 38. ovoga Zakona
 - h) iznos naknade za koncesiju ili osnovu za utvrđivanje iznosa naknade za koncesiju koju će Koncesionar plaćati
 - i) vrstu i vrijednost garancije za provedbu ugovora o koncesiji
 - j) ovlaštenje i rok nadležnom organu Koncesora za zaključenje ugovora u koncesiji
 - k) rok za uplatu jednokratne koncesione naknade propisan ovim Zakonom
- (2) Odluka o dodjeli koncesije može sadržavati i druge odgovarajuće podatke u skladu s tenderskom dokumentacijom, podnesenom ponudom te odredbama posebnog zakona.
- (3) Rok iz stava (1) tačka j) ovog člana ne može biti duži od tri godine.

Član 37.

(Odluka o poništenju postupka dodjele koncesije)

- (1) Koncesor će, na prijedlog nadležnog organa Koncesora, poništiti postupak dodjele koncesije u sljedećim slučajevima:
- a) ako postanu poznate okolnosti koje bi, da su bile poznate prije pokretanja postupka dodjele koncesije, dovele do neobjavlivanja javnog poziva ili do sadržajno bitno drugačijeg sadržaja tenderske dokumentacije, ili
 - b) ako nema pristiglih ponuda do isteka roka za dostavu ponuda, ili
 - c) ako nakon odbijanja ponuda u postupku dodjele koncesije ne preostane nijedna uredna ponuda, ili
 - d) u ostalim slučajevima određenim posebnim zakonima.
- (3) Odluku o poništenju postupka dodjele koncesije, s kopijom zapisnika o pregledu i ocjeni ponuda, nadležni organ Koncesora dostavlja ponuđačima u roku od 15 dana od dana donošenja.
- (4) Odluka o poništenju postupka dodjele koncesije objavljuje se u službenim novinama i na web stranici Koncesora na obrascu propisanom Uredbom iz člana 13. stav (13).

Član 38.

(Koncesije na zahtjev)

- (1) Koncesija za privredno korištenje općeg ili javnog dobra može se iznimno dati neposredno na zahtjev privrednog subjekta:
- a) kada mu je to nužno radi provedbe ugovora o javno-privatnom partnerstvu;
 - b) kada je to privrednom subjektu, koji je već proveo istraživanje mineralnih sirovina na osnovu dozvole nadležnog tijela, a na zemljištu nad kojim ima vlasnička prava, nužno radi sklapanja ugovora o koncesiji za eksploataciju mineralnih sirovina na prostoru koji

- je bio predmet istraživanja, a u skladu s odredbama propisa koji uređuju istraživanje i eksploataciju mineralnih sirovina
- c) kada je to privrednom subjektu, koji je već proveo istraživanje mineralnih sirovina na osnovu dozvole nadležnog tijela, a na zemljištu nad kojim nema vlasnička prava, nužno radi sklapanja ugovora o koncesiji za eksploataciju mineralnih sirovina na prostoru koji je bio predmet istraživanja, a u skladu s odredbama propisa koji uređuju istraživanje i eksploataciju mineralnih sirovina
 - d) ako postojeća i/ili planirana privredna aktivnost privrednog subjekta na određenoj lokaciji čini s predmetom koncesije za koju se zahtjev podnosi neodvojivu tehnološku ili funkcionalnu cjelinu te koncesija služi isključivo za obavljanje te privredne aktivnosti.
- (2) Mogućnost dodjele koncesije na zahtjev u skladu sa odredbama iz stava (1) tačke a) ovoga člana mora biti predviđena studijom opravdanosti za JPP projekat i tenderskom dokumentacijom za izbor privatnog partnera, a ugovor o koncesiji za privredno korištenje općeg ili javnog dobra, ukoliko se studijom dokaže kao nužan za provođenje JPP projekta, mora biti predviđen kao prilog ugovoru o JPP, u skladu sa zakonskim okvirom za javno-privatno partnerstvo.
- (3) Zahtjev za dodjelu koncesije podnosi se nadležnom organu Koncesora i mora sadržavati najmanje sljedeće:
- a. naziv privrednog subjekta, adresu, telefonski broj, broj telefaksa i adresu elektronske pošte podnosioca zahtjeva
 - b. vrstu i predmet koncesije
 - c. prirodu i obim djelatnosti koncesije
 - d. mjesto, odnosno područje obavljanja djelatnosti koncesije
 - e. rok na koji se zahtijeva dodjela koncesije
 - f. obrazloženje razloga za podnošenje zahtjeva, pravne, tehničke i financijske specifikacije predmeta koncesije
 - g. dokaz o ispunjenju pravnih, tehničkih i financijskih uvjeta sposobnosti propisanih posebnim zakonom
 - h. ponudu odgovarajuće garancije za provedbu ugovora o koncesiji
 - i. ponudenu naknadu za koncesiju.
- (4) Kod koncesije iz stava (1) tačka a), podnosioc zahtjeva uz zahtjev za koncesiju podnosi studiju opravdanosti za JPP, koja mora da sadrži procjenu vrijednosti koncesije izrađenu u skladu sa ovim Zakonom.
- (5) Kod koncesije iz stava (1) tačke b) i d) ovoga člana, podnosioc zahtjeva prije donošenja odluke o dodjeli koncesije na zahtjev dostavlja studiju opravdanosti i procjenu vrijednosti koncesije, u skladu sa ovim Zakonom.
- (6) Za koncesiju iz stava (1) tačka b) i c) dodatno se dostavlja elaborat o klasifikaciji, kategorizaciji i proračunu rezervi, rješenje nadležnog organa kojim se potvrđuju geološke rezerve i kvalitet mineralne sirovine te dokaz o vlasništvu nad zemljištem gdje se planira tražena koncesija odnosno dokaz o sredstvima uloženim u geološko istraživanje.
- (7) U postupku dodjele koncesije na zahtjev Koncesor prije donošenja odluke o davanju koncesije iz ovoga člana primjenjuje odredbe člana 24. ovoga Zakona.
- (8) U postupku dodjele koncesije iz stava (1) tačka c) ovog člana, nakon podnošenja zahtjeva za dodjelu koncesije, nadležni organ Koncesora, objavljuje javni poziv u skladu sa ovim Zakonom.
- (9) U slučaju da privredni subjekt koji je podnio zahtjev za dodjelu koncesije iz stava (1) tačka c) ne bude najbolji ponuđač, ima pravo na nadoknadu dokazivih troškova geološkog istraživanja od strane izabranog ponuđača.
- (10) Na prijedlog nadležnog organa, Koncesor donosi odluku o dodjeli koncesije ako su kumulativno ispunjeni sljedeći uslovi:
- a. dostavljena je sva dokumentacija navedena u stavu (3) i stavu (4) odnosno stavu (5) i stavu (6) ovoga člana
 - b. podnosioc zahtjeva ispunjava pravne, tehničke i financijske uvjete u skladu s posebnim zakonom
 - c. podnosioc zahtjeva ponudio je odgovarajuće garancije

d. ponuđena naknada za koncesiju viša je ili jednaka naknadi za koncesiju utvrđenoj posebnim propisom.

- (11) Koncesor donosi odluku kojom rješava o zahtjevu za dodjelu koncesije u roku koji ne može biti duži od 60 dana od dana zaprimanja urednog zahtjeva.

DIO DRUGI – UGOVOR O KONCESIJI

POGLAVLJE I. UGOVOR O KONCESIJI

Član 39.

(Sklapanje ugovora o koncesiji)

- (1) Ugovor o koncesiji se zaključuje nakon što nadležni organ Koncesora pribavi mišljenje nadležnog pravobranilaštva i nakon što izabrani ponuđač pribavi odobrenja u skladu sa posebnim propisima, u skladu sa rokom utvrđenim u odluci o dodjeli koncesije iz člana 35, stav (1), tačka j).
- (2) Ugovor o koncesiji sastavlja se u pisanom obliku, a potpisuju ga ovlaštena osoba Koncesora i odabrani najpovoljniji ponuđač ili podnosioc zahtjeva za dodjelu koncesije iz člana 38. ovoga Zakona.
- (3) Izabrani ponuđač dužan je u roku od 30 dana od dana stupanja na snagu odluke o dodjeli koncesije uplatiti bespovratnu jednokratnu koncesionu naknadu Koncesoru.
- (4) Ako izabrani ponuđač ne izvrši obavezu iz stava (1) ovog člana, smatrat će se da je odustao od zaključenja ugovora o koncesiji.
- (5) U slučaju odustajanja izabranog ponuđača od zaključenja ugovora o koncesiji, Koncesor zadržava uplaćenu jednokratnu koncesionu naknadu.
- (6) Ako odabrani najpovoljniji ponuđač ili podnosioc zahtjeva za dodjelu koncesije iz člana 38. ovoga Zakona odustane od sklapanja ugovora o koncesiji, Koncesor poništava odluku o davanju koncesije.
- (7) U slučaju iz stava (4) i stava (5) ovoga člana, Koncesor može donijeti novu odluku o davanju koncesije sljedećem rangiranom ponuđaču kao izabranom i koji zadovoljava uvjete u skladu sa tenderskom dokumentacijom te mu ponuditi potpisivanje ugovora o koncesiji.
- (8) Novu odluku o davanju koncesije iz stava (7) ovoga člana Koncesor dostavlja svakom ponuđaču u skladu sa Zakonom.
- (9) Na ugovor o koncesiji primjenjuje se Zakon o obligacionim odnosima.

Član 40.

(Garancija za provedbu ugovora o koncesiji)

- (1) Koncesor prije sklapanja ili prije stupanja na snagu ugovora o koncesiji prikuplja od izabranog najpovoljnijeg ponuđača, odnosno podnosioca zahtjeva iz člana 38. ovoga Zakona, za dobivanje koncesije potrebne garancije ispunjavanja obaveza iz ugovora o koncesiji, posebno naplate naknade za koncesiju, te naknade štete koja može nastati zbog neispunjenja obaveza iz ugovora o koncesiji (zadužnice, bankarske garancije, založno pravo na pokretnini i/ili nekretnini, korporativna jamstva, mjenice, polog).
- (2) Koncesor, na prijedlog nadležnog organa Koncesora, odlučuje o garanciji za provedbu ugovora, vodeći računa o procijenjenoj vrijednosti koncesije, ali i procjenama mogućnosti nastanka rizika uzimajući u obzir prirodu djelatnosti koncesije, finansijsko stanje Koncesionara, kao i ostale odgovarajuće elemente bitne za obavljanje djelatnosti koncesije.
- (3) Ugovor o koncesiji neće biti sklopljen, odnosno neće stupiti na snagu ako garancije iz stava (1) ovog člana ne budu dostavljena nadležnom organu Koncesora u roku određenom u tenderskoj dokumentaciji u skladu s posebnim zakonom.
- (4) U slučaju iz stava (3) ovoga člana, Koncesor poništava odluku o dodjeli koncesije i može donijeti novu odluku o dodjeli koncesije sljedećem rangiranom ponuđaču kao odabranom i koji

zadovoljava uslove u skladu s tenderskom dokumentacijom te mu ponuditi potpisivanje ugovora o koncesiji. Novu odluku o dodjeli koncesije, nadležni organ Koncesora dostavlja svakom ponuđaču u skladu sa ovim Zakonom.

(5) Garancija se čuvaju kod nadležnog organa Koncesora za finansije za vrijeme trajanja ugovora o koncesiji.

(6) Iznimno od stava (5) ovog člana, Koncesor može zadržati garanciju najviše do tri mjeseca nakon prestanka ugovora o koncesiji, ako postoje valjani razlozi za nastanak financijske obaveze, a što utvrđuje nadležni organ Koncesora, u skladu sa stavom (2) ovog člana.

(7) Iznimno od stava (6) ovog člana, garanciju je moguće zadržati i duže od roka iz stava (6) ovog člana ako je to predviđeno ugovorom o koncesiji.

(8) Garancija se može, u skladu sa tenderskom dokumentacijom i ugovorom o koncesiji, a nakon isteka polovine roka trajanja ugovora o koncesiji, zamijeniti garancijom iste vrste, ali umanjene vrijednosti koje odražava ostatak vrijednosti koncesije koju je izračunao nadležni organ Koncesor. Odluku o zamjeni garancije donosi Koncesor, na zahtjev Koncesionara i prijedlog nadležnog organa Koncesora.

(9) Nadležni organ Koncesora je dužan redovno provjeravati valjanost garancije.

(10) U skladu sa stavom (9) ovog člana, a u slučaju da priložena garancija nije valjana, nadležni organ Koncesor je dužan bez odgađanja zatražiti od Koncesionara dostavu nove odgovarajuće garancije.

Član 41.

(Sadržaj ugovora o koncesiji)

- (1) Ugovorom o koncesiji određuju se prava i obaveze Koncesora i Koncesionara na osnovu odluke o dodjeli koncesije u skladu s odredbama ovoga Zakona te posebnih zakona.
- (2) Na pitanja iz ugovora o koncesiji koja nisu uređena ovim Zakonom primjenjuju se odgovarajuće odredbe općeg zakona kojima se uređuju porezi te zakona kojima se uređuju opći upravni postupak i obligacioni odnosi.
- (3) Ugovor o koncesiji sastavlja se u skladu s odlukom o dodjeli koncesije.
- (4) Sva druga pitanja vezana za pravo na korištenje, vlasništvo i druga stvarna prava, a koja nisu regulisana odlukom o dodjeli koncesije, uređuju se u skladu s odredbama posebnih zakona i propisa kojima se uređuju stvarna prava.

Član 42.

(Naknada za koncesiju)

- (1) Naknada za koncesiju je javni prihod i plaća se u novcu.
- (2) Naknada za koncesiju plaća se jednokratno, nakon stupanja na snagu odluke o dodjeli koncesije, i kontinuirano za vrijeme trajanja ugovora o koncesiji.
- (3) Kontinuirana naknada iz stava (2) ovog člana može biti ugovorena kao stalan jednak iznos i/ili kao varijabilni iznos, zavisno o posebnostima predmeta koncesije, načelima utvrđenima studijom opravdanosti dodjele koncesije, odnosno analizom dodjele koncesije te posebnim zakonom.
- (4) Iznimno, naknada za koncesiju ne mora se ugovoriti u slučajevima kada je studijom opravdanosti za dodjelu koncesije ili analizom dodjele koncesije utvrđeno da nije financijski opravdana, osim ako drukčije nije uređeno posebnim zakonom.
- (5) Visina i način plaćanja naknade za koncesiju uređuju se Uredbom iz člana 13, stav (13), a može da ovisi o predmetu koncesije, procijenjenoj vrijednosti koncesije, roku trajanja koncesije, rizicima i troškovima koje Koncesionar preuzima i očekivanoj dobiti, obimu koncesije, opremljenosti i vrijednosti imovine, odnosno opremljenosti i površini općeg, javnog ili drugog dobra koje se daje u koncesiju.

- (6) Ugovorom o koncesiji može se odrediti promjena visine i/ili načina izračuna i plaćanja naknade za koncesiju u određenom razdoblju, za vrijeme trajanja ugovora o koncesiji, u skladu sa tenderskom dokumentacijom i odlukom o dodjeli koncesije.
- (7) Promjene naknade za koncesiju iz stava (6) ovog člana moguće su na osnovu:
 - a) izmjena posebnog propisa u dijelu kojim se uređuje visina i način plaćanja naknade za koncesiju.
 - b) izmjena tržišnih okolnosti koje dovode do značajno poremećene ravnoteže odnosa naknade za koncesiju i procijenjene vrijednosti koncesije koja je bila osnov sklapanja ugovora o koncesiji.
- (8) Promjena naknade za koncesiju u skladu sa stavom (6) ovog člana utvrđuje se ugovorom o koncesiji i posebnim zakonima, a vrši se ovisno o nastanku okolnosti i/ili periodično u za to određenim vremenskim razdobljima.
- (9) Naknade za koncesiju su prihod Budžeta Kantona i budžeta jedinica lokalne samouprave.
- (10) Omjer raspodjele prihoda od naknada za koncesije iz stava (8) ovog člana je 70% u korist jedinice lokalne samouprave, a 30% u korist Kantona neovisno od nadležnosti za dodjelu koncesije.

Član 43.

(Plaćanje naknade za koncesiju)

- (1) Koncesionar plaća novčanu naknadu za koncesiju u iznosu i na način kako je to uređeno ugovorom o koncesiji.
- (2) Ako Koncesionar ne plati naknadu za koncesiju u roku određenom ugovorom o koncesiji, svakom sljedećom uplatom, neovisno o tome što je Koncesionar označio da se tom uplatom plaća, smatra se da se najprije podmiruje zaostali dug po redosljedu dospijeca, i to tako da se prvo podmiruju troškovi, zatim iznos obračunate zakonske zatezne kamate i napokon iznos dospjele naknade za koncesiju.

Član 44.

(Zastara)

Pravo na utvrđivanje obaveze po osnovu naknade za koncesiju i kamata te pravo na naplatu obaveze po osnovi naknade za koncesiju i kamata, zastarijeva u skladu sa posebnim propisima koji uređuju oblast javnih prihoda.

Član 45.

(Izmjene ugovora o koncesiji)

- (1) Ugovor o koncesiji može se izmijeniti bez pokretanja novog postupka dodjele koncesije i sa pokretanjem novog postupka dodjele koncesije.
- (2) Izmjene ugovora o koncesiji za koje se mora pokrenuti novi postupak su:
 - a) izmjena vrste i/ili predmeta ugovora o koncesiji
 - b) promjena koncesionara
 - c) proširenje eksploatacionog polja
- (3) Iznimno od stava (2) tačke b) ovog člana, promjena koncesionara nije bitna izmjena ugovora o koncesiji ako nastaje kao posljedica korporativnog restrukturiranja koncesionara i/ili promjene vlasništva ili upravljačkih prava tog Koncesionara i/ili kao posljedica prijenosa dionica i poslovnih udjela i/ili promjena naziva privrednog subjekta.
- (4) Promjena Koncesionara iz stava (3) se može izvršiti ukoliko ne dolazi do odstupanja od uslova određenih za izbor Koncesionara u originalnoj tenderskoj dokumentaciji za dodjelu koncesije i ugovorom o koncesiji.
- (5) Bilo koja izmjena ugovora o koncesiji ne može se provesti bez pisane saglasnosti Koncesora.

Član 46.

(Radnje koje prethode izmjeni ugovora o koncesiji)

- (1) Izmjene ugovora o koncesiji mogu inicirati obje ugovorne strane.
- (2) Strana koja inicira izmjene ugovora o koncesiji, dužna je podnijeti sljedeću dokumentaciju:
 - a) detaljnu financijsku analizu učinka predloženih izmjena ugovora o koncesiji na budžet sa pripadajućim obrazloženjima
 - b) obrazloženje pravnog osnova za izmjenu ugovora o koncesiji
 - c) procjenu vrijednosti koncesije nakon izmjene ugovora o koncesiji sa opisom izmjena prava i obaveza ugovornih strana u odnosu na izvorni ugovor o koncesiji za koji se predviđaju izmjene,
 - d) obrazloženje ostalih uticaja koji nastaju kao posljedica izmjene ugovora o koncesiji.
- (3) Kada izmjena ugovora o koncesiji podrazumijeva neposredan ili posredan, ali predvidiv učinak na kantonalni budžet, strana koja inicira izmjene ugovora dužna je prije donošenja odluke o izmjeni odluke o dodjeli koncesije i sklapanja dodatka ugovoru o koncesiji zatražiti mišljenje ministarstva za finansije.
- (4) Ministarstvo za finansije daje mišljenje iz stava (3) u roku od 30 dana.
- (5) Izmjene ugovora o koncesiji po osnovu izmjena drugih relevantnih propisa su obavezujuće za obje ugovorne strane.

Član 47.

(Odluka o izmjeni odluke o dodjeli koncesije i aneks ugovora o koncesiji)

- (1) Aneks ugovora o koncesiji sklapa se na osnovu odluke o izmjeni odluke o dodjeli koncesije.
- (2) Postupak donošenja odluke o izmjeni odluke o dodjeli koncesije i sklapanje aneksa ugovora o koncesiji provodi se na način propisan članom 35. i članom 39. ovog Zakona.

Član 48.

(Registar ugovora o koncesiji)

- (1) Nadležni organ Koncesora dužan je registrovati ugovor o koncesiji i aneks ugovora o koncesiji u roku od 7 dana od dana potpisivanja u Registru ugovora o koncesiji.
- (2) Registar ugovora o koncesiji vodi kantonalno ministarstvo za finansije.
- (3) Registar ugovora o koncesiji je javan.
- (4) Javnim podacima u skladu sa stavom (3) ovog člana smatraju se:
 - (a) naziv Koncesora
 - (b) ID broj Koncesora
 - (c) naziv nadležnog organa Koncesora
 - (d) ID broj nadležnog organa Koncesora
 - (e) naziv Koncesionara
 - (f) ID broj Koncesionara
 - (g) datum potpisivanja, odnosno stupanja na snagu ugovora o koncesiji
 - (h) rok na koji je ugovor o koncesiji potpisan
 - (i) datum isteka koncesije
 - (j) vrsta koncesije
 - (k) naziv koncesije
 - (l) područje na kojem se koncesija obavlja
 - (m) visina i/ili način obračuna naknade za koncesiju.
- (5) Vođenje Registra ugovora o koncesiji znači prikupljanje i evidenciju podataka iz ugovora o koncesiji i vezane dokumentacije, pohranu podataka, upravljanje bazom podataka, osiguranje dostupnosti podataka te zaštitu baze podataka i dokumenata pohranjenih u arhivu.
- (6) Nadležni organ Koncesora je dužan pridonositi vođenju Registra ugovora o koncesiji stalnim praćenjem i saradnjom s ministarstvom za finansije.

- (7) Ministarstvo za finansije redovno izvještava nadležnog organa Koncesora o svim njegovim propuštenim radnjama i neispunjenju obaveza vezanima za vođenje Registra ugovora o koncesiji.
- (8) Nadležni organ Koncesora dužan je dostaviti ministarstvu za finansije svaku obavijest kojom se Koncesionara upozorava na uočeno neispunjenje obaveza iz ugovora o koncesiji.
- (9) Na zahtjev, ministarstvo za finansije može dati isključivo javne podatke iz Registra ugovora o koncesiji, dok je za davanje ostalih podataka i informacija koje nisu javne nadležan Koncesor.
- (10) Pravilnikom o Registru ugovora o koncesiji, koji donosi ministar finansija, propisat će se oblik i vođenje Registra ugovora o koncesiji, subjekti unosa, obaveznik i podnošenje dokumentacije za unos, provjera dokumentacije i unos podataka, plaćanje i evidentiranje naknade za koncesiju, unos podataka od strane nadležnog organa Koncesora, pregled podataka upisanih u Registar ugovora o koncesiji, pohranjivanje te zaštita i čuvanje podataka.

Član 48.

(Nadzor nad provedbom ugovora o koncesiji)

- (1) Nadležni organ Koncesora dužan je osigurati praćenje realizacije ugovora o koncesiji i aneksa ugovora o koncesiji.
- (2) U provedbi nadzora nad izvršavanjem ugovora o koncesije nadležni organ Koncesora dužan je:
 - a) kontinuirano nadzirati rad Koncesionara i izvršavanje njegovih obaveza iz ugovora o koncesiji
 - b) poduzeti sve propisane radnje za pravilnu, potpunu i pravodobnu naplatu naknade za koncesiju i pripadajućih kamata
 - c) osigurati pravilan i redovan unos podataka u Registar ugovora o koncesiji
 - d) redovno pratiti izvršavanje svih ostalih obaveza koje nastaju kao posljedica provedenih nadzora od strane inspeksijskih službi.
- (3) Nadležni organ Koncesora redovno, a najmanje jednom kvartalno, priprema Izvještaj o izvršenom nadzoru u skladu sa ugovorom o koncesiji i dostavlja ga ministarstvu za finansije i Koncesionaru odmah, a najkasnije u roku od 15 dana od dana izvršenog nadzora.
- (4) Izvještaj o izvršenom nadzoru iz stava (3) ovog člana naročito sadrži podatke o zahvaćenim i iskorištenim količinama predmeta koncesije za izvještajni period i služi kao osnova za pripremu fakture Koncesionaru od strane nadležnog organa Koncesora za finansije.
- (5) Nadležni organ Koncesora za finansije periodično, a najmanje jednom kvartalno, izvještava nadležnog organa Koncesora o realizaciji naplate za svaki pojedinačni ugovor o koncesiji.

POGLAVLJE II. PRESTANAK KONCESIJE

Član 49.

(Načini prestanka koncesije)

Koncesija prestaje:

- a) ispunjenjem zakonskih uslova
- b) raskidom ugovora o koncesiji zbog javnog interesa
- c) jednostranim raskidom ugovora o koncesiji
- d) pravosnažnošću sudske odluke kojom se ugovor o koncesiji utvrđuje ništavim ili se poništava
- e) u slučajevima određenim ugovorom o koncesiji
- f) u slučajevima određenim posebnim zakonom.

Član 50.

(Prestanak koncesije ispunjenjem zakonskih uslova)

Koncesija prestaje:

- a) istekom roka na koji je data, osim ako drukčije nije određeno ovim Zakonom
- b) prestankom pravne osobe Koncesionara, osim ako drukčije nije određeno ovim Zakonom, odnosno ugovorom o koncesiji
- c) ukidanjem, poništavanjem ili proglašavanjem ništavom odluke o dodjeli koncesije, u razdoblju nakon sklapanja ugovora o koncesiji.

Član 51.

(Raskid ugovora o koncesiji zbog javnog interesa)

- (1) Ugovor o koncesiji mora sadržavati odredbu o pravu Koncesora da odlukom raskine ugovor o koncesiji u potpunosti ili djelomično, ako Skupština Zeničko-dobojskog kantona ili Parlament Federacije Bosne i Hercegovine ili Parlament Bosne i Hercegovine odlukom utvrdi da to zahtijeva viši javni interes.
- (2) U slučaju raskida ugovora o koncesiji na osnovu ovog člana, Koncesionar ima pravo na naknadu štete od donosioca odluke iz stava (1), u skladu s odredbama ugovora o koncesiji i općim odredbama obligacionog prava.
- (3) U slučaju raskida ugovora o koncesiji na osnovu ovog člana, Koncesor sa područja kantona ima pravo na naknadu štete od donosioca odluke sa višeg nivoa vlasti iz stava (1), u skladu sa općim odredbama obligacionog prava.

Član 52.

(Jednostrani raskid ugovora o koncesiji)

- (1) Koncesor može jednostrano odlukom raskinuti ugovor o koncesiji u sljedećim slučajevima:
 - a) ako Koncesionar nije platio naknadu za koncesiju više od dva puta uzastopno ili općenito neuredno plaća naknadu za koncesiju
 - b) ako Koncesionar ne koristi koncesiju u skladu sa uslovima propisanih ugovorom o koncesiji, posebnim zakonima i drugim propisima
 - c) ako Koncesionar ne provodi propisane mjere i radnje nužne radi zaštite općeg, odnosno javnog dobra, te radi zaštite prirode i kulturnih dobara
 - d) ako je Koncesionar naveo netačne podatke u ponudi na osnovu kojih se utvrđivalo ispunjenje uslova određenih u tenderskoj dokumentaciji
 - e) ako Koncesionar svojom krivnjom ne započne s realizacijom ugovora o koncesiji ili njegovog dijela u ugovorenom roku
 - f) ako Koncesionar obavlja i druge radnje u suprotnosti s ugovorom o koncesiji ili propušta obaviti dužne radnje utvrđene ugovorom o koncesiji
 - g) ako je Koncesionar ustupio trećoj osobi svoja prava iz ugovora o koncesiji suprotno odredbama ovog Zakona i ugovora o koncesiji
 - h) ako Koncesionar ne dostavi novu odgovarajuću garanciju koju Koncesor zatraži na osnovu člana 40. stav (10) ovoga Zakona
 - i) ako se dogodila izmjena ugovora o koncesiji koja bi zahtijevala provođenje novog postupka dodjele koncesije
 - j) ako je u vrijeme donošenja odluke o dodjeli koncesije postojao razlog za isključenje Koncesionara iz člana 24. ovog Zakona
 - k) u drugim slučajevima u skladu s odredbama ugovora o koncesiji i odredbama zakona kojima se uređuje opći upravni postupak.
- (2) Koncesionar može jednostrano odlukom raskinuti ugovor o koncesiji u sljedećim slučajevima:
 - a) ako Koncesor ne izvršava svoje obaveze iz ugovora o koncesiji
 - b) ako zbog strateške poslovne odluke, odluči da prestane sa obavljanjem djelatnosti

- (3) Prije jednostranog raskida ugovora o koncesiji, strana koja jednostrano raskida ugovor o koncesiji mora prethodno pisanim putem upozoriti drugu stranu o takvoj svojoj namjeri te odrediti primjeren rok za otklanjanje razloga za raskid ugovora o koncesiji i za izjašnjavaње o tim razlozima.
- (4) Ako druga strana ne otkloni razloge za raskid ugovora o koncesiji u roku iz stava (3) ovog člana, na prijedlog nadležnog organa Koncesora odnosno na zahtjev Koncesionara, Koncesor će, na prijedlog nadležnog organa Koncesora, donijeti odluku o raskidu ugovora o koncesiji i raskinuti ugovor o koncesiji.
- (5) Odlukom o raskidu ugovora o koncesiji moraju biti navedeni i obrazloženi razlozi raskida, utvrđen obim i redoslijed radnji koje obje strane moraju poduzeti u skladu sa ugovorom o koncesiji i posebnim zakonima, te iznos štete ako je šteta nanešena.

POGLAVLJE III. NADZOR, PRAĆENJE I IZVJEŠTAVANJE O PROVEDBI ZAKONA

Član 53.

(Upravni nadzor)

- (1) Upravni nadzor nad provedbom ovoga Zakona i propisa donesenih temeljem ovoga Zakona obavlja Direkcija za koncesije.
- (2) Upravni nadzor naročito obuhvata:
 - a) pravovremenost, tačnost i urednost unosa podataka u Katalog potencijalnih koncesionih projekata;
 - b) pravovremenost, tačnost i urednost unosa podataka u Registar ugovora o koncesiji;
 - c) pravovremenost, tačnost i potpunost naplate naknade za koncesiju.
- (3) U provođenju upravnog nadzora iz stava (2) tačka c) ovog člana nadležne službe za finansije JLS dužne su saradivati sa Direkcijom za koncesije, u smislu odredbi iz člana 42. stav (9) i stav (10) ovog Zakona.

Član 54.

(Inspeksijski nadzor)

- (1) Inspeksijski nadzor nad provedbom ovoga Zakona i propisa donesenih na osnovu ovoga Zakona, te posebnih propisa vezanim za predmet koncesije, obavlja nadležni inspektor Koncesora, u zavisnosti od predmeta koncesije.
- (2) Inspeksijski nadzor naročito obuhvata:
 - a. kontrolu nezakonitog korištenja općeg i/ili javnog dobra
 - b. kontrolu obavljanja djelatnosti za koju je ovim Zakonom i posebnim zakonima propisano da se obavlja na osnovu koncesije, bez zaključenog ugovora o koncesiji;
 - c. kontrolu obavljanja djelatnosti izvan obima i predmeta koncesije određenog ugovorom o koncesiji;
 - d. kontrolu pravodobnosti, pravilnosti i potpunosti naplate naknade za koncesiju;
 - e. kontrolu sa aspekta propisa koji regulišu zaštitu okoliša
- (3) U provođenju inspeksijskog nadzora iz stava (1) ovog člana, nadležna inspekcija Koncesora poduzimanje mjera propisanih ovim Zakonom naređuje donošenjem rješenja u pisanoj formi.
- (4) Žalba protiv rješenja nadležnog inspektora Koncesora na kantonalnom nivou izjavljuje se drugostepenoj komisiji Vlade, a protiv rješenja nadležnog inspektora Koncesora na JLS nivou, izjavljuje se drugostepenoj komisiji gradonačelnika/načelnika.

Član 55.

(Ograničenje ili zabrana obavljanja djelatnosti)

- (1) U provedbi inspekcijskog nadzora, inspektor će odmah, radi onemogućavanja daljnjeg nezakonitog postupanja u slučaju opisanom u članu 54. stav (2) tačka b), rješenjem zabraniti obavljanje djelatnosti privrednom subjektu.
- (2) U provedbi inspekcijskog nadzora inspektor može, kada to okolnosti slučaja zahtijevaju, radi onemogućavanja daljnjeg nezakonitog postupanja rješenjem ograničiti ili zabraniti obavljanje djelatnosti Koncesionaru za kojeg se utvrdi da je nezakonito postupanje iz člana 54. stav (2) tačke c), d) i e) ovog Zakona.
- (3) Rješenje iz stava (1) ovog člana izvršava se bez odgode pečačenjem prostorija, postrojenja, uređaja i druge opreme za rad ili namijenjene radu ili na drugi pogodan način.
- (4) Druga oprema za rad ili namijenjena radu iz stava (3) ovog člana je i svaka oprema koja se na direktan ili indirektan način koristi u obavljanju djelatnosti, što uključuje tehničko-tehnološke instalacije i sva pokretna sredstva (prometna sredstva, mašine, šatori i slično).
- (5) Ograničenje ili zabrana obavljanja djelatnosti izvršava se do otklanjanja utvrđenih nedostataka.
- (6) Rješenje iz stava (1) i stava (2) ovoga člana dostavlja se nadziranom subjektu u pisanom obliku odmah, a najkasnije u roku od osam dana od dana njegova donošenja.

Član 56.

(Godišnja informacija o koncesijama)

- (1) Koncesor, na prijedlog nadležnog organa Koncesora, dostavlja Skupštini Kantona odnosno Gradskom/Općinskom Vijeću do 30. juna tekuće godine za prethodnu godinu, informaciju o koncesijama.
- (2) Sadržaj i način pripreme informacije iz stava (1) ovog člana propisan je Uredbom iz člana 13. stav (13) ovog Zakona.

DIO TREĆI - PRAVNA ZAŠTITA

Član 57.

(Pravna zaštita)

- (1) Na odluku o izboru najpovoljnije ponuđača iz člana 33. stav (1), može se izjaviti žalba drugostepenoj komisiji Koncesora u roku od osam dana od dana prijema odluke.
- (2) Pokrenuti upravni spor odlaže dalji postupak dodjele koncesije do pravosnažnosti odluke iz člana 33. stav (1) ovog Zakona.

Član 58.

(Rješavanje sporova)

- (1) Za rješavanje sporova koji nastanu ili bi mogli nastati iz ugovora o koncesiji isključivo je nadležan sud prema sjedištu Koncesora.
- (2) Stranke ugovora o koncesiji rješavanje sporova koji nastanu ili bi mogli nastati iz ugovora o koncesiji mogu podvrgnuti arbitraži, osim ako to posebnim zakonom nije drukčije uređeno.
- (3) Ugovorom o koncesiji kojim se omogućava arbitraža iz stava (2) ovog člana mora se navesti obaveza prethodnog obraćanja drugoj ugovornoj strani sa zahtjevom za mirno rješenje spora koji ne može biti kraći od tri mjeseca od dana dostave zahtjeva za mirenje.
- (4) Pravila postupka iz stava (2) ovoga člana određuju se u skladu sa zakonom kojim se uređuje arbitraža.

DIO ČETVRTI - PREKRŠAJNE ODREDBE

POGLAVLJE I. PRAVNA ZAŠTITA

Član 59.

(Najteži prekršaji)

- (1) Novčanom kaznom od 20,000 KM do 200,000 KM kaznit će za privredni prijestup privredni subjekt ili Koncesionar koji:
 - a. koristi predmet koncesije bez zaključenog ugovora o koncesiji, u vezi sa članom 54. stav (2) tačka b);
 - b. koristi predmet koncesije izvan obima definisanog ugovorom o koncesiji, u vezi sa članom 54. stav (2) tačka c).
- (2) Novčanom kaznom od 2,000 KM do 20,000 KM kaznit će za privredni prijestup odgovorna osoba privrednog subjekta ili Koncesionara za radnje iz stava (1) ovog člana.
- (3) Novčanom kaznom od 5,000 KM do 10,000 KM kaznit će fizička osoba za radnje iz stava (1) tačka a) ovog člana.

Član 60.

(Teški prekršaji)

- (1) Novčanom kaznom od 10,000 KM do 100,000 KM kaznit će Koncesionar koji:
 - a) neblagovremeno ili nepravilno ili nepotpuno izvršava obaveze o plaćanju naknade za koncesiju, u vezi sa članom 54. stav (2) tačka d);
 - b) korištenjem predmeta koncesije suprotno uslovima datim u okolinskoj dozvoli ili svojim djelovanjem u većoj mjeri ugrožava okoliš, u vezi sa članom 54. stav (2) tačka e)
 - c) netačno izvještava o količini iskorištenog općeg ili javnog dobra koje je predmet koncesije.
- (2) Novčanom kaznom od 2,000 KM do 20,000 KM kaznit će odgovorna osoba Koncesionara za radnje iz stava (1) ovog člana.
- (3) Novčanom kaznom od 10,000 KM do 100,000 KM kaznit će se za privredni prijestup Koncesor ili nadležni organ Koncesora ukoliko:
 - a) započne postupak dodjele koncesije iako u vezi s predmetom koncesije teku upravni ili sudski postupci ili postoje neriješeni imovinskopravni odnosi
 - b) otkrije sadržaj ponuda konkurentskim ponuđačima;
 - c) ne isključi gospodarskog subjekta iz sudjelovanja u postupku dodjele koncesije ili razloge za isključenje na odgovarajući način;
 - d) redovito ne provjerava valjanost jamstva ili u slučaju da priloženo jamstvo nije valjano bez odgađanja ne zatraži od Koncesora dostavu novog odgovarajućeg jamstva
 - e) u Registar koncesija ne unese ili ne dostavi pravodobno ili točno ili potpuno propisane podatke ili isprave
 - f) kontinuirano ne nadzire rad Koncesionara ili izvršavanje njegovih obaveza iz ugovora o koncesiji, a što uključuje i redovito praćenje izvršavanja plaćanja naknade za koncesiju, ako je ona određena ugovorom o koncesiji
 - g) ne poduzme sve propisane radnje za pravilnu ili potpunu ili pravodobnu naplatu naknade za koncesiju i pripadajućih kamata
 - h) u propisanom roku ne izvrši provjeru je li odnosna uplata naknade za koncesiju i pripadajućih kamata izvršena pravilno u smislu propisanog načina uplate
 - i) u slučaju neplaćanja ili nepotpunog plaćanja naknade za koncesiju u propisanom roku o tome pisanim putem ne obavijesti Koncesora ili u propisanom roku ne pozove Koncesora na plaćanje dospjele naknade za koncesiju ili pripadajućih kamata

- j) ne aktivira jamstva iz članka 55. ovoga Zakona ili ne poduzme ostale mjere prisilne naplate duga po osnovi neplaćene naknade za koncesiju
 - k) zasnuje založno pravo na pokretnom i nepokretnom predmetu koncesije bez prethodne saglasnosti nadležnog organa Koncesora.
- (4) Novčanom kaznom od 5,000 KM do 10,000 KM kaznit će se za privredni prijestup odgovorna osoba Koncesora ili nadležnog organa Koncesora ili član stručne komisije za koncesije za radnje iz stava (3) ovog člana.

Član 61.

(Lakši prekršaji)

- a) Novčanom kaznom od 5,000 KM do 50,000 KM kaznit će se za privredni prijestup Koncesionar koji:
 - a. koji ustupi prava i obaveze iz ugovora o koncesiji drugim privrednim subjektima bez saglasnosti koncesora
 - b. koji prenese kontrolni udjel na treće osobe bez saglasnosti koncesora
- b) Novčanom kaznom od 1,000 KM do 5,000 KM kaznit će se za privredni prijestup odgovorna osoba Koncesionara za radnje iz stava (1) ovog člana.
- c) Novčanom kaznom od 5,000 KM do 50,000 KM kaznit će Koncesor ili nadležni organ Koncesora koji se ne pridržava rokova za donošenje akata u postupcima pripremnih radnji, dodjele koncesije i nadzora nad provođenjem ugovora o koncesiji.
- d) Novčanom odlukom od 1,000 KM do 5,000 KM kaznit će se odgovorna osoba Koncesora ili nadležnog organa Koncesora za radnje iz stava (3) ovog člana.

POGLAVLJE II. PRELAZNE I ZAVRŠNE ODREDBE

Član 62.

(Usklađivanje postojećih kantonalnih propisa)

- (1) Svi kantonalni propisi koje se odnose na oblast koncesija moraju se uskladiti sa odredbama ovog Zakona u roku od jedne godine od dana stupanja na snagu ovog Zakona.
- (2) U slučaju da su odredbe drugih zakona i propisa u suprotnosti sa ovim zakonom primjenjivat će se ovaj Zakon.

Član 63.

(Postupci započeti prije stupanja na snagu ovoga Zakona)

- (1) Postupci dodjele koncesija koji su započeli prije stupanja na snagu ovoga Zakona te sudski ili drugi postupci koji se vode vezano za te koncesije dovršit će se prema odredbama propisa koji su bili na snazi u vrijeme njihova pokretanja.
- (2) Postupci nadzora koji su započeli prije stupanja na snagu ovoga Zakona dovršit će se prema odredbama propisa koji su bili na snazi u vrijeme njihova pokretanja.

Član 64.

(Postojeći korisnici općeg ili javnog dobra)

- (1) Svi privredni subjekti koji obavljaju djelatnost za koju je prethodnim i ovim Zakonom utvrđena obaveza zaključenja ugovora o koncesiji dužni su u roku od 90 dana od dana stupanja na snagu ovog Zakona podnijeti zahtjev za dodjelu koncesije u skladu sa članom 38. ovog Zakona.
- (2) Nakon isteka roka iz stava (1) ovog člana, na privredne subjekti koji obavljaju djelatnost bez zaključenog ugovora o koncesiji primjenjive su prekršajne odredbe iz člana 58. stav (1), tačka a).

- (3) Ugovori o koncesiji sklopljeni do stupanja na snagu ovoga Zakona ostaju na snazi do isteka razdoblja na koje su sklopljeni i mogu se mijenjati u skladu sa odredbama ovog Zakona.

Član 65.

(Donošenje podzakonskih akata)

- (1) Vlada Zeničko-dobojskog kantona će, na prijedlog Ministarstva za prostorno uređenje, promet i komunikacije i zaštitu okoline, osnovati Direkciju za koncesije iz člana 11. ovog Zakona, u roku od 90 dana od dana stupanja na snagu ovog Zakona.
- (2) Vlada Zeničko-dobojskog kantona će, na prijedlog Direkcije za koncesije, donijeti uredbu iz člana 13. stav (13) ovog Zakona u roku od 90 dana nakon početka rada Direkcije za koncesije.
- (3) Ministar za privredu donijet će pravilnik iz člana 48. stav (10) ovog Zakona u roku od 90 dana od dana stupanja na snagu ovoga Zakona.

Član 66.

(Prestanak važenja propisa)

Danom stupanja na snagu ovoga Zakona prestaje važiti Zakon o koncesijama – Prečišćen tekst („Službene novine Zeničko-dobojskog kantona“ broj 5/03.).

Član 67.

(Stupanje na snagu)

Ovaj Zakon stupa na snagu osmoga dana od dana objavljivanja u Službenim novinama Zeničko-dobojskog kantona, a primjenjivat će se u roku od 6 mjeseci od dana osnivanja Direkcije iz člana 11. Zakona..

Broj:

Datum:

Zenica

PREDSJEDAVAJUĆI SKUPŠTINE
ZENIČKO-DOBOJSKOG KANTONA
Jasmin Duvnjak

PRILOG I

PRILOG II

PRILOG III